



Synfocity = 1009

mail us at : mzsynfo@gmail.com; mizoramsynod@gmail.com - Phone - 2314648

October 31, 2025

□ Board leh Committee peng hrang hrang an th̄u

♦ October 27, 2025 (Thawhtanni) khan Theological Education Board (TEB) chu Committee Room - I, Synod Office-ah an th̄u a, hei hi kumina vawi 6 an th̄utna niin, budget session a ni nghal a ni. Meeting hi Rev. R.C Lalnghakliana, Moderator-in a kaihrui a, Secretary reports ngaihthlak a ni. 2026-2027 chhunga TEB budget tur ruahmanna leh Synod Inkhawmpui 2025-a TEB Report turte thlir ho a ni a. Hei bakah hian Tahan Theological College atanga dilna awm ngaihtuah a ni bawk.

♦ October 28, 2025 (Thawhlehi) khan Synod Hospital Board vawi 152-na chu JM Lloyd Hall, Synod Office-ah an th̄u. Meeting hi Rev. R.C Lalnghakliana, Moderator-in a kaihrui a, Secretary report ngaihthlak a ni. Kum 2026 leh 2027-a pension turte en ho a ni a, he mi bakah hian John Williams Hospital Managing Committee member ruat chungchang te, College of Nursing Principal ruat chungchang te, Assistant Nursing Superintendent ruat chungchang te, House officer inrawihna dan ennawn chungchang te, Nursing Service hming thlak chungchang te, Kidney transplant ti thei tura hmalak chungchang te, Two Wheeler parking chung siam chungchang, Synod Hospital-ah lung lam enkawl na changtlung zawk a awm theih nana hmalak rawtna te, Post Anaesthesia Recovery Room (PACU) siamna tura building extend leh budget-a dah dilna te, Electric Power Distribution system tihchangtlun leh a in sak that dilna te, Synod hnuai hna dilte Medical Fitness Certificate lakna man tlawm zawka tih rawtna Bial atanga lo lut ngaihtuah te, Synod Hospital-a security kal phung en that rawtna Presbytery atanga lo lut te, Synod Hospital leh John Williams Hospital additional budget chungchang te, Synod Hospital leh College of Nursing-a budget head thar dil ngai thlirho te, kum 2026-2027 chhung atana Synod Hospital, John Williams Hospital leh College of Nursing budget ruahmanna te leh Synod Hospital report tur thlir ho te chu thu ngaihtuah langsar zualte an ni.

♦ October 29, 2025 (Nilaini) khan JM Lloyd Hall, Synod Office-ah Synod Pastoral Committee an th̄u a, hei hi 2025 - 2027 term-a an vawihnih th̄utna a ni. Meeting hi Rev. R.C. Lalnghakliana, Moderator-in a kaihrui a, Upa Vanlalsawma Siakeng, Secretary-in report a pe. Thu ngaihtuah zingah kum 2026-a Pro. Pastor lak zat tur tihchian leh kum 2026-a Pastoral Ministry thupui tur thlan bakah Pastor Bial leh a kaihnawih hrang hrang - Bial thar hawn, Bial then, Bial siam rem, Bial hming thlak leh Bial th̄ut hmun chungchangte chu a langsar zualte an ni. Committee-ah hian member 97 an kal thei a, Aizawl khaw pawn atangin member 66, Aizawl chhung atangin member 31 an kal a ni.

October 30, 2025 (Ningani) khan JM Lloyd Hall, Synod Office-ah Synod Education Board an th̄u a. Meeting hi Rev. R.C. Lalnghakliana, Moderator-in a kaihrui a, Secretary report ngaihthlak a ni. Report-ah hian Synod Higher Secondary School, P.C. Gilrs' School, MPC Sikulpui leh PES te dinhmun hrang hrang tarlan a ni a. Supervisor of Schools (PES) boral thu leh a aiawh ruat a nih thute tarlan a ni. Tun tumah hian tha zawka PES enkawl dan tur chungchang te, PES (Middle School) zirlai bua Kristiana Vanram Kawngzawh thu telh ve chungchang te, PES hawn dilna te ngaihtuah a ni a. Hei bakah hian 2026-2027 atana School hrang hrangte budget ngaihtuah a ni bawk.

♦ Vawiin (Oct. 31, 2025) khan JM Llyod Hall, Synod Office-ah Synod Literature & Publication Board vawi 31-na an th̄u a, thu ngaihtuah tur pangngai pasarih (7) bakah 2026-2027 budget an thlirho a, Synod Inkhawmpui 2025-a report tur an thlirho bawk.

Meeting hi Rev. R.C. Lalnghakliana, Moderator-in a kai hruai a. Secretary report ngaihthlak niin, report-a a lan danin Kristian Tlangau chanchinbu chu copy 45,000 tihchhuah a ni a. Kristian Naupang copy 34,000 leh Synod Newsletter copy 1,41,000 tihchhuah a ni bawk. Heng thla kip chhuak chanchinbu enkawltu tur Editorial Board Member-te tarlan a ni a, lehkhabu 24 tihchhuah a ni bawk. Literature campaign/seminar neihpuiin hmun 36-ah an chhuak bawk a ni.

Thurel zingah Presbytery atanga lut Puitling Sunday School zirlaibu leh Nilai leh Beihruai Thupui bute uluk leh fel fai zawka kalpui rawtna te, Nilai leh Beihruai bua tawng dang awmte Mizo tawnga a lan dan uar zawka dah rawtna te, Synod House Style chungchang leh Thawnthu inphuahsiak buatsaihte chu a langsar zual an ni.

❑ **MUHCS chungchangah Mizoram Sorkar & Mizoram Synod-in inremna thuthlung (MoA) ziak**
 October 28, 2025 tlai dar 3:00 khan Pi Lalrinpuii, Minister, H&FW Dept., office-ah Mizoram Sorkar leh Mizoram Synod chuan Mizoram Universal Health Care Scheme (MUHCS) chungchangah inremna thuthlung an ziak. Synod Executive Committee vawi 314-na chuan Synod Hospital, Durtlang leh John Williams Hospital, Lungleiin MUHCS zawm a lo rem ti tawh a. He mi atana thil t̄ul leh pawimawhte bawhzuiin, tih fel ngaite tih fel a nih hnuah inremna thuthlung hi an ziak ta a ni.
 Inremna thuthlungah hian Mizoram Synod aiawhin Rev. R.C. Lalngkhakliana, Synod Moderator-in hming a ziak a; Rev. Dr. K. Lallawmzuala, Exe. Secretary, i/c Hospital leh Upa Vanlalsawma Siakeng, Synod Secretary-ten hriatpuina hming an ziak bawk. Sorkar lam aiawhin Dr. Lalhriatzuali Ralte (IAS), CEO, Mizoram Universal Health Care Scheme (MUHCS)-in hming a ziak a, Dr. R. Lalchuanawma, Dy CEO leh Dr. C. Vanlaldusaka, MO ten hriatpuina hming an ziak ve bawk a ni.
 Rev. R.C. Lalngkhakliana, Synod Moderator chuan, “Hun rei tak indawrna a kal hnuah heti anga inremna thuthlung kan ziak thei ta hi a lawmawm em em a. Kohhran mipui ten t̄angkai taka an hman ngei ka beisei” a ti. Inremna thuthlung (MoA) ziah programme tawi hi Rev. V.L. Luaia Hranleh, Sr. Executive Secretary, Mizoram Synod chuan lawmthu sawia t̄awngt̄aiin a t̄in a ni. Inremna thuthlung hi November 1, 2025 a t̄anga hman t̄an tur a ni ang.

❑ **Khawvel Sunday School Ni 2025**
 November 2, 2025 (Pathianni) hi Khawvel Sunday School Ni a ni a. Kumin Khawvel Sunday School Ni-ah hian Mizoram Presbyterian Kohhran chuan puitling lamah “Fanau Enkawl”, Upa B. Lalmunliana ziah an zir ang a. Intermediate Department - Senior Department-in “Tleirawl te leh Social Media”, Upa Lalrammawia Ngente ziah an zir ang a, Beginner Department - Junior department-in “Thu Awihna”, Lalpianthangi Hrahsel ziah an zir ang.

Sunday School hi kum 1780-ah England ram, Gloucester khuaa Robert Raikes-a din a ni a. Hemi hma pawh hian mi t̄ahnemngai eng emaw zatin anmahni huam chungah mumal deuh takin an kalpui tawh a. Kalphung fel zawka a indin chhuahna leh a darh zau takna chu Robert Raikes-a hmalakna a ni. Thil siamna hmuna thawk naupangte ziak leh chhiar thiam lo, inkhawm ngai miah lote chu hruai khawmin, Pi Meredith-i inah ama sum senga zirtirtu ruaiin a zirtir a. Vawi khat class lakah zirtirtute hi shiling khat a hlawhtir nia sawi a ni. Kum 1805 a t̄angin John Wesley-a hma laknain hlawh neia zirtirtu rawih chu tihtawp a ni ta a ni.

Dodalna nasa tak hnuaiia bul t̄an ni mah se, Sunday School hi mi chanhaiten zirna an dawn theihna hmasa ber a nih avang leh Sunday School kaite nunah danglamna nasa tak an hmuh avangin a darh zau zel a. A tira hmusit taka elsentute ngei chuan, “Robert Raikes-a hian Gloucester khuaa sihal rualte chu beramnoah a chhuah vek a ni,” an ti hial a. Pawi khawihna tlahniama jail tang an tlem tak em avangin Gloucester khua leh a chheh vela dan lekkawhtu leh thubuai remtu inzawm khawmte chuan kum 1805-ah Robert Raikes-a hnenah inthurualin lawmthu sawina lehkha an thawn hial a ni.

India ramah July 9, 1803 a t̄angin missionary ropui William Carey-a leh a t̄iante (Serampore Trio) hma laknain Sunday School neih t̄an a ni a. Mizoramah pawh Zosap Rev. D.E. Jones-a (Zosaphluia) hma laknain February 20, 1898 a t̄angin mei mit lovin kan nei zui ve ta a ni.

Oct. 22, 2025 (Nilaini)a MSSU Committee Report-a a lan danin tunah hian MSSU hnuaiia Sunday School 1035, Hotu 6,031, Zirtirtu 55,480 leh Zirtu 4,27,261 awmin, hming ziak zawng zawng hi 4,88,772 an awm mek a ni.

Chawimawina kan neihte pek chhuah zat hetiang hi a ni:

1. Diploma Award – 12,622
2. Jubilee Award – 1,655
3. Pi Zaii Medal – 26,399
4. Pi Zaii Medal Special – 1,874
5. Zalawra Medal – 28,278
6. Zalawra Medal Special – 2,333

Khawvel hmun hrang hrangah Sunday School inzawmkhawm pawl din a ni a. Kum 1785-ah Society for Promoting Sunday School-in the British Dominions din a ni a, January 11, 1791-ah American Sunday School Society din a ni leh a, India ramah pawh 1876-ah Indian Sunday School Union din a ni. Khawvel huapa Sunday School inzawm khawmna ‘World’s Sunday School Association’ chuan kum 1889-ah London-ah convention hmasa ber neiin kum thum danah neih t̄hin a ni.

Khawvel Sunday School Ni hi World's Sunday School Association-in kum 1907-a Rome khawpuia Convention an neih tumin he pawla an Treasurer ni mek, Tabernacle Presbyterian Church, Philadelphia Upa ni baw Dr. George W. Bailey-a chuan a rawt a, chu thu chu 1910-a Washington-a Convention an neih tumin an sawi ho leh a, May 22, 1910-ah he hun hi an hmang tan ta a ni. Dr. George W. Bailey-a hi kum 1913-1916 chhungin World's Sunday School Association-ah President a ni zui ta nghe nghe. February 16, 1944-a MSSU Committee-in a rel angin Mizoramah chuan kum 1944 atangin Khawvel Sunday School Ni hman tan a ni a. 1949 atangin November thla Pathianni hmasa berah thupui neia hmang tanin, kum 2001 atangin puitling leh naupang lam ten zirlai hran an zir tan a, kum 2019 atangin naupang lam chu hmun hnih - Beginner - Junior leh Intermediate - Senior-ah then a lo ni leh ta a ni.

❑ **Kristian Thalai Pawl**

October 25, 2025 khan Central KṮP hruaitute leh Kum 2026 KṮP General Conference Organising Committee-te Saitual-ah thu khawmin, thil pawimawh hrang hrang an sawi ho. Thut khawmnaah hian General Conference-a mikhual thlen dan tur te, Pandal leh Stage ruahman dan tur te, Sound leh Light chungchang te, sawm bik mikhualte dawnsawn dan turte, lirthei veivah dan tur leh tul dangte sawi ho a ni. Chawhnu lamah pandal sakna tur field leh hmunhna pawimawh dangte en ho nghal a ni baw.

❑ **Kohhran Hmeichhia**

October 23-28,2025 chhung khan PWF 19th Biennial Conference, Rymbal, Meghalaya-ah neih a ni a. He hun hmang hian Kohhran Hmeichhia atangin bial aiawh - AMC area atangin mi 40 leh AMC pawn atang mi 66 an kal. Central Committee mi 41 an kal a, ATTWI (Association Of Theologically Trained Women in India), Aizawl Unit aiawh mi 2 te an kal a, heng bakah hian Dr. Lalthansangi Fanai, PWF Chair Person, Pi Lalmuanzuali, PWF Standing Committee, Pi Lamchhingi, Nomination Committee te bakah Dr. Rosy Zohmingthangi (Speaker) te an kal baw.

❑ **MSSU**

November 1, 2025 khan Tipa Pastor Bial - Laki & Amobyu Vaihthie Kohhranah Puitling leh Naupang Sunday School Training neihpuiin MSSU Trainer - Upa K. Zoremsanga, Kulikawn leh Upa K. Vanlalnghaka, Ramhlun East te an kal.

❑ **Worship**

October 29 - 31, 2025 khan Phainuam Kohhranah Music training neihpuiin Tv. H. Lalthazuala, Music Instructor leh Tv.Lalrorelkima te a kal.

❑ **Hruaina Eng TV Programme**

31.10.2025 (Zirtawpni) 05:00 pm : Kristian Naupang Pual
1.11.2025 (Inrinni) 05:30 pm : Puitling Sunday School Zirlai
2.11.2025 (Pathianni) 07:00 am : Sermon
 - Upa R. Thuamluaia : Nangmahnin Ei Tur Pe Rawh U
 08:00 am : Weekly round up
4.11.2025 (Thawhlejni) 06:00 pm : Nilaini zan thupui
 08:30 pm : Kohhran Chanchin - Ramhlun Venglai Kohhran

❑ **FM Zoawi - Aizawl & Lunglei : Hruaina Eng Radio Programme**

October 31, 2025 (Zirtawpni) @ 7:30 p.m. :

- 1) Solo : Lalrammuani- Ka soal ata ka tlantuin.
- 2) Zaipawl : Lunglei Presbyterian Choir- Thilmak chhuisenloh.
- 3) Thusawi : Upa Zothanmawia- Lalpa rawng chauh bawl.
- 4) Solo : Baby Lalrosangi- Fahrah hla.
- 5) Zaipawl : Electric Veng Bial Zaipawl- Aw tunah hian chanchin mak tak

☐ **Moderator leh Executive Secretary-te Programme :**

Rev. R.C. Lalnghakliana, Moderator Prog:

- Nov. 6-10, 2025 - CKTP Programme, Delhi
- Nov. 3, 2025 - TRUST Committee
- Nov. 4, 2025 - Social Front Committee
- Nov. 5, 2025 - Partnership & Worship Committee
- Nov. 11-13, 2025 - Synod Executive Committee

Rev. V.L Luaia Hranleh, Senior Executive Secretary Prog:

- Nov. 3, 2025 - TRUST Committee
- Nov. 9, 2025 - Sihphir Venghlun Kohhran

Rev. Dr. K. Lallawmzuala, Executive Secretary Prog:

- Nov. 3, 2025 - TRUST Committee
- Nov. 4, 2025 - Social Front Committee
- Nov. 5, 2025 - Worship Committee
- Nov. 6-7, 2025 - SMTC zirlai interview
- Nov. 8-10, 2025 - FG & CC Seminar, Kolasib

Rev. Dr. Rosiamliana Tochwawng, Executive Secretary Prog:

- Nov. 3, 2025 - TRUST Committee
- Nov. 5, 2025 - Worship
- Nov. 7, 2025 - New Eden Biak In hawn
- Nov. 8-10, 2025 - India ram khawpui lian KTP Meet, Delhi

RAWNGBAWL HNA DIL THEIH

Synod Revival Committee chuan kum 2026 - 2028 (kum hnih) chhung thawk tur Synod Revival Speaker mi 60 a la leh dawn a. Dil duh te tana hriat tur :

- Form lak chhuah tan ni : October 6, 2025
- Form theluh hun tawp : November 21, 2025
- Interview hun : December 3, 2025
- Dil thei chin : Mizoram Presbyterian Kohhran mi, kum 30 leh 60 inkar
- Form lak chhuah & theluhna hmun : Revival Department, Synod Office
- Beisei dangte : 1. Tualchhung Kohhrana thuhrlitu emaw, kohhranin thuhmila a rawih thin
2. Zuk leh hmuam a filhim
3. Presbyterian Bible School-a zir chhuak
4. Kohhran inkhawm ngai pawimawh leh Revival rawngbawlinaa lo tel tawh thin

Sd/-

Rev. V.L. Luaia Hranleh
Senior Executive Secretary
i/c Revival, etc.

